



ハ 6
190
24



文帝全書

附錄藝文

勅詩賦碑記
目錄

八和
190
24

知
門八
號190
卷24



藝文附錄

文昌司祿宏仁梓潼帝君勅封

延祐三年

維明有禮樂。維幽有鬼神。妙顯微之一貫。在天為星辰。在地為河岳。形功用于兩間。矧能陰騭于大猷。必有對揚于懋典。蜀七曲山文昌宮梓潼帝君。光分張宿友詠周詩。相予泰運。則以忠孝而左右斯民。炳我坤文。則以科名而選造多士。每遇揀于菑患。彰感應于勸懲。貢舉之令。再頒考察之籍。先定賁飾。雖加于渙汗。徽稱未究于朕心。於戲。予欲文才輩出。爾丕炳江漢之靈。予欲文

治宣昭爾濬發奎璧之府。庶臻嘉號以荅寵光。可加封
輔元開化文昌司祿宏仁帝君主者施行。

勅建七曲山梓潼殿御製詩成化十年憲宗

桂花內殿懸穹窿。揮毫博翰宣皇風。宏仁輔國治道公。
奎璧呈秀光昭融。化書具載敷神功。英華雲錦浩氣冲。
昊天師範金闕崇。飛鸞開化多靈通。如意救劫妙無窮。
主司科目輝儒宗。詞章筆翰何奇聰。庸愚敬奉開迷蒙。
紫霞遍覆騰九重。琉璃光燦映帝容。皇圖悠久社稷隆。
人安物阜年華豐。聖母彌壽如天同。宮闈衍慶承併蒙。

七曲朝陽海日紅。帝德萬載佑朕躬。

張亞子廟

方輿勝覽張亞子廟
卽七曲山梓潼神廟

唐李商隱

下馬捧椒漿。迎神白玉堂。如何鐵如意。獨自與姚萇。

通玄觀建啟元殿詩

明沈友儒

中垣有象如旋珠。名曰文昌光陸離。其下四曜兩兩微。
文武祿命皆主司。惟觀有像久乏祠。事誠有待人爲之。
隸名老氏行則儒。敦崇文教敢怠而。棟宇言言丹碧輝。
洋洋如在誰可欺。有祈輒應福如茨。明禋昕夕來羣黎。
惟人克誠神乃依。淑慝旌別誠之基。煌煌天鑒詎可違。

科名接武諒在茲神亦永享祠無墮

桂香殿賦

國朝 尤 侗

太歲己未仲春三日恭遇元皇降誕之辰律中夾鐘星
分營室月丁在圉日戊維元兩輪合璧五曜連珠慶雲
起而呈祥惠風開而媚景於是帝君乃御桂香之殿以
受朝賀鑾輿旣設鐘鼓斯張三界胥歸百神竝集玉局
校書之士瑤宮橐筆之官靡不蹈舞清塵咏歌聖德臣
侗僻居下土仰望天階未能備職於仙班猶願廁名於
文苑不揣蕪陋敬成桂香殿賦一篇獻於左右以申萬

壽之祝云爾其辭曰

若夫穹蒼之上太微之虛九野旣闢五城是區張千門
而立萬戶拱十二之樓居帝座高騫於閭闔列宿環衛
於周廬爰有文昌躔在東壁斗魁戴筐六府主集大將
建威武之權尙書正左右之職貴相理緒於太常司隸
班賞於爵秩太史定命以滅咎大理佐寶而消忒秉七
曲以運衡度九重而卜宅於是黃道肇域紫極規方定
中作室樞紐啟房峙八柱之崔嵬布三階之康莊折若
木以荷橑抗虹霓而承梁蒼龍揚鬚於左个白虎垂尾

於右傍。朱鳥矯翼於前榮。玄龜匿首於後堂。設鈎陳而
覆華蓋。護南宮於中央。構大厦之耽耽。立應門之將將。
雕玉璵以居易。裁金璧以飾璫。鎖銅虬於畫棟。纏鐵鳳
於飛廊。颺翠氣之宛延。曳紅采之裔皇。鋪丹墀與青瑣。
皆五色而十光。入東序以納溫。出西清而迎涼。紛登降
以爛音鹽爛。若乍陰而乍陽。仰寶殿於中天。錫嘉名以桂
香。象廣寒之清虛。類方諸之浩茫。照水晶之洞澈。韻藥
珠之琳琅。陋猗蘭與扶荔。卑五柞與長楊。彼漢室之桂
宮。又何足以頡頏。爾乃四壁塗丹。八牕削素。藻井凌雲。

莖盤承露。白榆周阿。青芝夾路。秀紫脫於華林。挺翠竄
於瑤圃。嘉南州之炎德。植小山之芳樹。每結子以葳蕤。
時飄香而容與。拂羽衣以翔鸞。偃玉杵而馴兔。開四出
以爭妍。占一枝而獨步。則有圖籍之府。著作之庭。廚藏
百史。庫貯九經。五車郗載。十緹充楹。厥各四部。甲乙丙
丁。縹囊緗帙。玉躑音變金籟音盈。首山紫泥之字。翠嬀蘭采
之文。赤虹玉尺之祕。朱雀靈寶之珍。以至一乘三藏。八
素九晨。蘭臺虎觀之所未識。石渠天祿之所未聞。包羣
玉與二酉。矧邱索與典墳。乃有閨苑逸才。清都彤史。龍

翰鳳雛之英。蘭薰雪白之士。金玉淵海之倫。黼黻河漢之子。莫不珥管來遊。巾車至止。編玳瑁以裝書。裁琅玕而印紙。架珊瑚於麟角。匣琉璃於龍尾。摛文則金石九章。咏詩則笙簧四始。既游行於六藝。亦縱橫於八體。辨經緯與宮商。讎魯魚與亥豕。笑集賢與延英。詎二局之足擬。於是帝君戴翠帽。垂珠旒。被袞衣。襲雲裘。建明月之干旌。樹招搖之華輶。金人佇立於筍簾。玉女連娟於芬桴。搖五明於雉尾。燒百和於螭頭。執如意以指揮。驂白衛而周流。挾天章於雲漢。洋闔澤於方州。乘青陽之

淑麗。樂絳霄之優游。北斗起而酌酒。東海進而添籌。南極贈以瓊玖。西母獻其珍羞。咸登平而履城。音戚永贊美以揚休。臣拜手曰。皇哉。願萬歲而千秋。

梓潼縣文昌靈應祠碑

明 潘高梅

文昌靈應祠。在七曲山中。出梓潼縣北七里。爲送險亭。言蜀棧道之險。至此而盡也。亭居岩畔。下有龍潭。巖間時現赤霞。世傳五丁力士遺劍處。間發寶光。少進爲鳳山路。東接鳳凰山。又里許爲千佛巖。巖壁鏤佛象。咸飾金彩。旁鑄紫府飛霞洞記。上覆以亭。前爲飲馬池。池水

常滿道此而入曰忠孝樓。祠之臯門也。樓累三層。高百尺。自楚黃鶴而下。莫之與京。樓後歌臺。始與樓之二層竝。上奉文昌殿。左右設鐘鼓。兩廡列配享。皆秩秩有則。後爲桂香殿。丹粟秋飄。一邑盡染。彌月猶馥。是爲蜀王府建。左卽風洞。景前爲子母聖殿。被子者駢集。轉上重階爲啟玄殿。又上爲天尊殿。殿前爲八方臺。以觀天象。由樓北行。亦陟重階。爲盤陀石。有坊曰盤陀仙跡。其石圓如磨。高三尺許。上肖聖像。據胡牀盤坐。再北升爲應夢臺。象八卦。中有石牀。壁間繪應夢事蹟。臺右晉柏二株。其形盤踞如虯龍。色含蒼翠。自晉代傳於今。幾三合抱。攝峰頂爲望水亭。而觀止矣。世所傳文昌事。瑰奇儻儻。詳載化書中。

泰嶽文昌祠碑

明 汪道昆

天官書。斗魁戴筐六星。曰文昌宮。一曰上將。二曰次將。三曰貴相。四曰司命。五曰司中。六曰司祿。祠家則以其降神於蜀。率象神而祠之。尊北極者。主元君尸祝之義。鈞也。太嶽專祠北極。百神附焉。顧文昌迄今不祠。不佞嘗言之。柳使君所使君謝曰。昔在司禮。先帝幸以文昌

像賜朝。朝至於今。與事之。毋敢失墜。先帝崇事太嶽。不啻介邱。今上幸而使朝奉璽書主祠事。方懼無以稱上。任使。倍先帝恩。今乃依北極祠文昌。且尊君賜禮也。於是相與經始。得隙地於三公峰之陽。東距天門。可當斗口。甃石高若干尺。爲堂。廣若干筵。堂外層軒待乞靈者。夫北斗定四時。繫八極。而文昌用事。則文武爵祿之司其命。曰文。右文事也。我二祖用武定天下。以文守之。當時若劉文成以下諸臣。庶幾各世。孝宗守文繼治。王文成乃在公車。關中洛下并鳴。文始興矣。世宗操禮樂。

爲治。天下文明。在事之臣。各用其職。諸尚書郎奮起。若駕八駿而馳崑崙。何翩翩也。今天子聖明。無改先帝之舊。閎儒秉國。壯士盈庭。海內名家。罔有遺佚。以故文德四洽。遠人來歸。得全全昌。此其時也。禮時爲大。祠不亦宜乎。使君故嘗主藏書。以知禮顯。是役也。則天象協地。宜興人文。尊風化。樂康禮合矣。故使君決策從之。其經費悉取諸舍中。筦庫之士無所預。會藩大夫李君以部署至。計日而祠成。楚人祠故有歌。祖迎皆用此。太岳在楚。請爲神楚歌。歌曰。列幽宗兮天閭。疏文石兮華堂。躡

瑤光兮當戶。帥三公兮鴈行。靈之來兮雍雍。乘歎玉兮
雲中。臣聖哲兮爲役。黜口耳兮鴻濛。履遠遊兮璆鈺。升
天衢兮張皇。導羣賢兮先路。熾明德兮無疆。釋余驂兮
闡風。緩予佩兮離宮。覲昌暉兮當世。歷千祀兮升中。

北嶽文昌祠碑

明 汪道昆

元君北帝也。我國家建都北極。奧主元君。盛德始於北
而濟於南。二時俱在於楚。則時元岳。文皇帝治之。於越
則時白岳。肅皇帝治之。一以鉅麗。一以神奇。絜其廣狹
不同。亦晉之於魯也。所出同矣。夫天象懸衡於北斗。戴

筐而居斗口者曰文昌。二時故未有特祠。殆非類於上
帝之義也。往余有事元岳。乃始建文昌祠。祠成業已勒
石紀其事。及余旣釋拜政。退就父母之邦。則以望祀同
科。胡爲乎獨詘於此。會馮使君行縣至。余輒以祠議抵
使君。使君慨然應曰。司馬有意乎斯文。叔吉幸得爲役。
顧岳形皆北鄉。諸祠事因之地利則然。其於方位無當
也。其西麓出而爲阜。故以形勝。面南冠阜爲亭。亭廢不
治。要以南觀五老。左提三孤。控二水爲隍。負天都若展。
蓋正位而立。獨當一奇。建祠便。於是檄縣長吏發贖金

三十斤。則亟以劉守復董其成。邑人叅軍金汝賢爲植其制。悉出使君部署。不五月而告成。使君則以碑屬焉。請得如元岳故事。適予在疚。使君尋以遷秩行。及余以卜葬謁元君齋宿祠下。旣完且美。庶幾乎瑤光之庭。卽隩區神臯。避三舍矣。竊惟明興以文治治天下。實惟諸神光輔列聖而左右之。括蒼於越。具曰文成。哀然竝舉。余往爲之揚挖。則元美以爲不易。作者將自託名高。惡用兩君子爲質。余悚然意下。不佞於是乎失言。夫仲尼以身繫斯文。本之自文王始。純德不顯。則文王之所以

爲文。卽三代之英。宜不及此。今之名世兩君子。豈不偉哉。其一爲帝者師。其一聖人之徒也。要諸文德以爲德。則爲緝熙文治以爲功。則爲怙冒文言以爲言。則爲易教之潔淨精微。以是曰文。文之至也。借曰未喪。兩君子然乎哉。近世愈益卑卑。務自引而高。一世文學侍從之臣。猥自以爲黼黻詞章之士。猥自以爲桓文。卽有所長。其何以希不朽。以是而槩諸君子。其猶朝菌之視大椿。與嵩高之詩曰。惟嶽降神。生甫及申。自昔藉藉。稱楚材。其爲嶽降不虛矣。惟茲產上都而被首善。蔚爲國禎。非

文廟全書 附錄 九
有所待而興。此其選也。乃今連茹而進。翩翩而拔前茅。亦既如林矣。上之爲周召之治。爲訓誥之文。經緯天地。以成章。煌煌乎明德也。下之則知天命如括蒼。知性與天道如於越。卽德非其至。星隆則從而隆。抑或急近功。持卑議。曾雕蟲之不若。侈然自以得與於斯文。此之謂晷德。晷星。天垂象而嶽效靈。何爲也。時馮使君以方伯居楚都。人士述不佞之言。告徐君侯。君侯楚人。時以方祀而飾祠事。乃進都人士。申不佞之言。夫象而列星形。而名嶽。天文也。太上立德。其次立功。其次立言。人文也。

若殷良弼。若漢宗臣。遜志興學。以佐中興。鞠躬盡瘁。以輔少主。天人徵應之符不爽矣。三命二表。則其緒餘。都人士第師文王。學孔子。時而鹽梅。時而魚水。無施而不宜。司馬非直爲南國謀。且以張楚。非直張楚。且以廣厲四方。成位無良。顧以是而廣使君之德意。乃抵二史氏屬會。令君乾亨勒之。庶東。

武林文昌祠碑

明 郭子章

今宇內祈禱祠文昌君者。其槩有三。有崇其武功祀之者。說在典祀。劍州梓潼君張亞子。仕晉戰沒。人爲立廟。

文帝全書 附錄
唐元僖兩宗入蜀。神屢擁護。宋咸平中。神殲王均。招安使以聞。詔飭祠晉王號。少府造衣冠法物祭器。於是介冑橐鞬之夫。爭禱而祠焉。有因其綰文柄而祀之者。說在化書。神累世業儒。刻意竹素。帝命掌天曹。桂籍。凡士鄉舉里選。祿秩爵封。皆隸於神。於是射策甲乙。轡文龍虎之士。爭禱而祀焉。有謂神佐南斗注生祀之。說在眉山蘇氏。其曰張仙者。神本張宿。婁昭張氏。入蜀稱北郭張生也。張弓挾彈者。神本張。張本黃帝子。揮始造弧矢。不忘其初也。禮男子生懸弧矢。又祀高禰。禮於所御者。

帶以弓鞬。授以弓矢者。祈男之祥也。蘇氏以玉環易彈。歸誕軾轍。爲宋名賢。於是世之弗無子者。爭禱而祀焉。顧總而命之曰文昌。何也。文者精所聚。昌者揚天紀。輔拂竝居。以成天象也。象似戴筐。星有六一。曰上將。大將軍建威武。次二曰次將。則主武事。三曰貴相。太常理文緒。四曰司祿。司中司隸賞功進爵。則主文事。五曰司命。則主人間似續生滅。夫星者陰陽之精。氣本在地。而見於天。文昌所居。鄰於斗魁。名曰天府。又星之最鉅者。其能役使羣動。受辭祝史。有以哉。武林湖山梵宇。

文廟聖書 附錄
充斥獨未有祠文昌者。萬歷十三年。御史大夫溫公鎮撫於浙。拓故集慶寺隙地祠之。溫公爲諸生。夢神示以赤黃懸幟而登第。後夢神錫之璋告之名而生男。故公祀神惟茲。已乃釀訾聚材。竝力鳩工。始十三年九月。訖於十五年四月。祠成。六年。子章來督儲於藩。祠僧普秀。丐言紀之。余惟神忠孝文武之跡。鏘洋化書。夫人而知之。本本原原。未易窺測。余涉內典。讀文昌大洞經。首曰。靈風太和。玉音流精。至哉自然。誰識元文。寂寂無色。永劫無沉。茲非文武之根苑。忠孝之橐籥乎。彼禱而祠者。

欲蘄遂。謀蘄獲。則亦非神旨矣。夫橐籥介胃之夫。未必皆郭李韓岳也。神毋張逆幟。毋敗忠謀。甲乙龍虎之士。未必皆孔顏曾史也。神毋翊浮薄。毋右隱怪。弗無子求有子之說。未必皆玄鳥壇石之誠也。神毋絕伯道之兒。而綿磔鼠之葉。毋餒羊石之鬼。而應塗高之讖。詩曰。嗟爾君子。好是正直。神之聽之。介爾景福。章之所禱祀於神者。以此而系之辭。辭曰。青陽啟祚。孤宿兆瑞。是生帝胄。熙秉神懿。赳赳金姿。瑩瑩玉梓。流形吳會。鬯道潼水。神人相之。畀以如意。如意一麾。威震九地。武堪夷亂。文

足範世爲臣死難。鏘洋忠義。救萌康國。屢朝褒勸。七曲不騫。兩劍竝峙。騎箕聖窟。鎮星黃石。彼烈者疇。振古再幟。於赫靈風。上應文昌。座鄰魁前。象埒戴筐。六府是司。天權之綱。乘參麗井。炳烜鳳凰。顯於萬化。九十六生。風動星搖。靈武維揚。殲均戕曦。力掃欃槍。縮文籍桂。顯遂善良。無嗣者弗。祈有者慶。南斗助靈。祿官嘉祥。神畱宇宙。廟食侯王。吳越分祠。虎林卜焉。彼溫司馬。獨虔尸祝。廼創元宅。集慶之隩。基肇古刹。發祥天目。右拳飛來。左抱三竺。允文允武。以似以續。天開紫微。放愚巴蜀。大道

無言。化書則或。真諦扶教。爲世醒覺。體合玄黃。色判清濁。不爲上睨。不爲下躡。虎符龍券。光靈如昱。貞名標輝。千秋膏馥。

西湖文昌宮碑

明 李維禎

渡西湖而北。踰九里松。走靈隱天竺道也。集慶寺縮轂其口。寺創宋理宗朝。割寺一隅而爲文昌宮。則自萬歷間。今御史大夫三原溫公始祠。後故齋閣毀於毒龍。僧普秀新之。而御史中丞劉公以其廩首事。觀察賴川陳公禱祠有應。礪閣下方而屬不佞記之。蓋太史公天官

書言斗柄戴筐六星。曰文昌宮。各爲上將。次將。貴相。司命。司中。司祿。蜀人所謂張亞子。戰沒而成神。唐元僖兩宗入蜀。神隆相無患害。則所謂上將。次將之說也。化書曰。神世業儒。上帝使主仕籍。則附會貴相。司祿之說也。或言神故張星。而爲張氏子。其先爲黃帝。揮造弓矢。挾彈射諸物不祥者。使人宜子。子壽考。則附會司命。司中之說也。此其說經生所不信。然萬物之精。上爲列星。明則爲人。而幽則爲神。保章氏掌天星。志其變動。辨其吉凶。定其分野。以觀妖祥。散食於地而祭之。名之曰布。是

寧無義而盡。以爲悠謬不經乎。瑤光爲雀。爲燕。爲蝙蝠。玉衡爲雞。爲兔。爲桃李。爲椒。爲荆房。爲馬。爲機。爲麟。樞爲鳳。爲鸞。爲聲火。爲烏。虛爲槐。夫物有然而況於人乎。說之箕尾。敷之少微。白之長庚。朔之歲光。客部之使。陳荀之德。畫一策而太白食昴。出一言而熒螢音螢惑退舍。此其著者也。而何必文昌之不爲張氏子乎。舜肇十二州。禹更爲九。四岳九官十二牧。入則典司政本。翼襄主德。出則總領諸侯。經營四方。內外不簡。音其勞逸適均。考張星分在三河。而文昌無所不屬。以文昌應張仙。跋歷中

外。豈天垂象而二帝則之。爲岳牧建官式耶。神蜀人而饗有越祀。魂氣無所不之也。夫何疑焉。不佞又考神在周爲張仲。是吉甫之良友。而周宣王之各相也。吉甫伐西戎。嚴狃勤勞著在西北。而仲坐論黻展者。使王任賢無二。得盡吉甫之用。內順治而外威嚴。周道燦然。中興仲。無智名勇功。而功名實居最多。其應惟曰孝友。總百行。總三才。一以貫之矣。文昌之七十化。義當取此。孝弟之至。通於神明。卽以當列宿。令天下齋明盛服。承祭其誰曰不然。如流俗所傳。神有慚德。是爲淫祠。何以聲靈

胖音隙音響音未施敬於民而民敬也。不佞從陳公秦越遊二十年矣。古人有言。清如玉壺冰。直如朱絲繩。公足當之。諸郎君十歲以下。衣布食蔬。夙興夜寐。書聲達戶外。人罕覲其面。屬小恙。叩神輒應。其奏假在屋漏。言動之先矣。不然。武林緇黃之宮。香火填委者無算。而公獨廩廩昭事文昌也。不佞故畧閣規制經費。與登覽名勝。不書。而特爲著其文義如右。神道設教。儻此類乎。

保昌重建文昌祠碑

國朝 鄭 遜

文昌主人間祿籍爲上帝文衡。其祠于學宮。非古也。人

文帝全書 附錄
之觀在文。天之觀在行。有生而貴顯。以不善而黜。有生而貧賤。以善而升。神豈能自擅其禍福。特因人之行而禍福之爾。場屋之觀亦在文。庠序之觀亦在行。故師儒之道與天道合。則祠于學宮。亦未爲戾于古也。神卽周大夫張仲。以孝友見稱于詩者。可以知其行也。祠舊在東偏。頗湫隘。用形家言。嚮巽峯。以翊文運。因徹爽塏而高廣之。嗚呼。自變故以來。文運亦幾頓矣。或者士行弗謹。風斯靡然。豈所稱因人之行而禍福之者耶。茲予所以翊文運之意。願與諸生求端于張大夫之孝友。若夫

科第之所以盛。其權固不在于神也。舍而求諸巽峯。益未矣。

崇德學宮魁星亭記

宋陸垓

國朝自崇寧行三舍州縣歲貢辟廡。逮宣和甲辰。貢士復合試于科舉。詔春官增省額。其得以名徹奏篇。寘之科甲者。八百有八人。徽學沈公由秀之崇德。充賦京師。爲天下第一進士之選。莫盛于是。公之居室。舊寓廣福精舍。南抵通衢。嘗以狀元目其坊。中更亂離。故實湮廢。里居之士。每相與歎息。慮其久而易泯也。宣城奚君以

儒學長斯邑。垂意鄉校。行且報政。振其餘力。營東西二齋。以漸恢教養之規。僉謂先賢駿蹟。鬱而未彰。殆無以起人心而助風化。於是蒐舊聞。訪遺像。朋盍而請于縣。置祠序室。仍卜地於東北隅。培土。巋然建亭其上。命之曰魁星。爽塏翬飛。面勢軒敞。前撫平疇。萬耦分塋。旁瞰漕渠。千艘順颿。吾邑勝槩。恍然皆會于楹檻几席之間。一旦與掄魁之耀。發越呈露。開豁心目。其殆數使然歟。夫一氣浮乎太虛。輝粲森列。在朝象官。在人象事。昭昭不誣也。昔陳太邱偕子姪造荀氏。英雋參會。精發于天。

德星有亭。猶見圖志。况地靈人傑。裊然特起其上。動躔緯正。如左角之於賢者。少微之於處士。東壁之於君子。揭名斯亭。以表類應。豈非桑梓之偉事哉。觀公奉對于大廷。搯之以策。絘之以象。參伍錯綜。窮極幻眇。而終始乎體道用數之說。越三舉而得張公九成。再得汪公應辰。雖紆詞闡義。自出機軸。而條貫本末。舉會于一者。蓋自公指授之故。橫浦謂公呼玉山為嫡孫。詩不云乎。以似以續。續古之人。今吾邑里冠蓋相望。或以名第奮。或繇閎閱顯。至於父子繼科。兄弟同榜。未易一二數。而莫

氏五桂。華萼連枝。世尤鮮儷。詩書禮樂。相輝相映。里之秀民。家之良子弟。無不風厲於學。高山景行。勉企前修。聯鑣利賓。必有嗣公之嫡者。斯固邑大夫與鄉先達所望士友之意也。公諱晦。字元用。皇祐初。大父嘗策廷魁。以郊社齋郎。遂爲馮京之亞。公又自禮闈前列。臚傳龍首。大有家聲。見於褒綽。官簿履歷。登載國史。若立朝大節。則橫浦祭公之文爲詳。今讀之。凜凜生氣。其表見于世。而託諸不朽者。又不止以科名云。慶元戊午上元日。

語溪重建魁星亭記

明 靳一派

氤氳金石。鬱爲斗精。奠厥西北。峙爲乾靈。秀灑之氣。與星躔河嶽。相摩盪。萃爲千人。萬人之英。備是三者。乃以名吾亭。客曰。世以魁星顏夫閣若亭者。幾罄冠帶。窮無垠。獨語溪學宮之一廛。沈氏邁晦之相尋也。與哉。而數百年後。猶仍其名。非侈舊耶。抑亦圖新。余輒然曰。星氣下屬。何常之有。總惟其時。惟其人。世沾沾以科名。鳴拘于見也。不有道德文章。勲業卓冠海寓者乎。是非絕類離倫。不擇地而生者乎。邑有魁閣。廢蓋有年。爰有剩材。是革是遷。捐俸鳩工。剏而新焉。費西北隅。桂阜之巔。八

窻瓊瓏。噓呷雲煙。帆飛鳥翔。時隱見于雉堞平林之外。而館署間舍。鱗次而車駢。講藝之暇。師弟子振衣其上。一逖覽而境地超然。博士東陽趙君。偕滁陽陳君。三衢趙君。詔諸士而進之曰。而不繹夫名亭之意乎。有其精。有其靈。斯有其英。三者全而名乃不虛。諸士盍勉旃哉。余聞其言。合乎真詮。因援筆而爲之記焉。萬歷庚戌秋日。

上饒奎樓記

明 孫原貞

嘗觀天之二十八宿。當南北極之中。環列而應。四方各

七宿。而奎乃七宿之第一宿也。宿之列次有遠近。度之。分數有多寡。日麗天一日一周。而不及天一度。積而至。期三百有六旬有六日。歷徧二十八宿而爲三百六十五度四分度之一。此一歲周天之數。而奎十有八度也。前璧後婁。相次聯布。循天左行爲之經也。日月五星往來遲疾。遡天右行爲之緯也。經緯運行。循環無端。天文之明也。其懸象在乾。十六星屈曲相鈎。主文章之畫。故聖翰謂之奎畫。其分野在魯。孔聖攸生。五緯聚奎。周程張朱繼出。今聖朝繼統。奎光禎應。天下文明。爾諸生朝。

夕出入斯門。可不瞻仰名義。思星宿之經緯。垂象于天者。常運行不息。思聖賢之經傳。垂憲于世者。宜傳習勿休。仁義道德。得之于心。著之于文章。猶經星之布體。緯象之合度。芒寒色正。光采動人。由是應賢科以觀國光。躋膺仕以亮天事。庶無慚師教。而有光郡大夫之勸也。

固始朱衣閣記

國朝 楊汝楫

士君子春秋兩闈。一旦風雲會合。如獲重寶。通衢乍驚乍喜。自以為非常之遇。我何得偶然致也。愚夫愚婦。駢肩咨嗟。僉以為非神佑不及此。故相傳有朱衣點頭事。

夫學成名立。分應爾也。得之不足為喜。失之不足為悲。吾人潛修爾室。自有對天地而質鬼神者。區區影響之談。疑非通儒所道。雖然。事有不盡無據者。侯鯖錄載歐陽公知貢舉。每閱卷。坐後常覺一朱衣人點頭。然後文入格。不爾。無復與考。噫嘻。永叔文章宗匠也。學擅三良。史裁五代。當知貢舉時。以冰心玉壺出。而品題高下。自必得于牝牡驪黃之外。以彰藻鑑而羅奇士。乃顛倒于渺不可知之人。如可入格。頭而點。幸已。設不可入格。而茫茫亦點。則可者黜。而不可者收。天下有永叔而亦聽

于若有若無之中耶。然錄云。坐後常覺朱衣點頭。則覺者惟永叔覺之。而旁之人無與焉。竊疑公爲社稷大臣。其道德勲業。光簡冊而耀日星。必不肯爲無稽之說。駭聽聞而炫惑當世也。則朱衣之神。其有無足怪者。文廟之西。固人購地爲余築生祠。自揣涼德。媿不敢當。而東隅奎樓。西獨缺如。且不足爲宮墻煥。爰捐俸庀材。創建此閣。遂奉朱衣神像于其中。固文藪也。神文主也。以文明之象。而開文明之運。意者以離色元吉。以乾首利見。其補袞之山甫耶。其赤舄之元聖耶。其畫錦之魏公耶。

吾爲神也。祝又爲固也。望而吾于此有感焉。士子之文章。主司得而知之。士子之德行。主司不得而知之。在學者讀書。有行美而文亦美者。有文美而行不美者。隱微之際。人禽分焉。主司一入棘闈。卽目光如炬。未有燭于內而悉其行者。神以聰明。正直立于其上。無物以亂其心。無勢以搖其權。頭之點也。以行也。非以文也。頭之不點也。亦以行也。非以文也。故士求主司之顯而識。不如求朱衣之隱而公。求朱衣之隱而公。又不如求吾心之靜而專。誠而明。則以朱衣進退人才。而俾士生敬心畏。

心以期爲不媿鬼神不媿朝廷之人焉。此閣其與文廟並峙也夫。

長洲杜真君祠記

國朝 尤 侗

吾郡之有文星樓。位在巽方。總持文教。元皇上帝之所主也。其東偏以杜真君從祀焉。康熙甲寅八月望日。有神降於翰林侍講彭子定求家。時彭子方舉孝廉不第。家居抱羸疾。中夜禮斗。偶設一乩。真君感而憑焉。其言曰。吾乃文昌宮右局大夫。道號長春子。前生杜氏。名喬林。字君遷。江南華亭人也。明萬歷丙辰進士。官至浙江

布政使。茲奉元皇命。以彭子讀書有孝行。不幸而有疾。特遣天醫治之。且天榜預注。當於康熙丙辰科會狀及第。聞者咸以爲幽謬不經之談。而彭子篤信獨深。居無何。彭子體中震撼。若改易骨節者。夙疴頓愈。至丙辰果掄大魁。一如真君言。然後里俗之人。莫不服至誠。前知昭灼若此。嗣是朝夕臨壇。誨誡諄切。迨庚申仲春。在京師。著心懺一書。有皈誠首罪赦過。省幾定志。篤行養性。化物事天。凡九條。大旨與感應篇陰騭文相表裏。舉以警覺狂蒙。甚盛意也。是秋彭子假歸。遂奉真君神主入

祠郡中學士。翕然從之。每月朔望。郡會時習堂肄業。數十年來。人才蔚起。科甲蟬聯。徼天之福。與地之靈。微文昌之力。不及此。而真君所以闡揚扶翼者。與有力焉。百爾君子。其可無報乎。侗自甲寅冬。獲奉教於真君。及戊午入都。當悲憂窮蹙之時。真君垂憫而善道之。因承乏纂修明史。撫公遺行。竊爲列傳。稽公生平。有孝有德。恂恂長者。其爲吏治。文而無害。武而不殘。稱良二千石。記曰。法施於民。則事之以勞。定國。則事之以公。之生前。已合祀典。况乎神而明之。在帝左右。其能夾輔九天。長受下

土之馨香宜矣。公之歿也。給事許子譽卿。銘其墓曰。其鴻文則祭酒。而其正氣則明神。嗚呼。其信矣乎。

武義縣學文昌閣記

國朝 彭啟豐

武義爲金華屬邑。唐天授年。置。余嘗按其圖誌。東距括蒼。西通太末。壺山熟水。亦婺奧區也。宋淳熙間。呂東萊先生。講學於明招寺。朱元晦。張敬夫。時相往來。而金華之理學。以著。流風漸被。鼓篋庠序者。類多樸茂。好修士。其城西向。有文昌閣。明萬歷間。邑令熊秋芳。建舊址。蕪沒久矣。錢塘姚遠。翹旣來。秉鐸考課。訓迪。具有法度。暇

時顧邑之士言曰。某以振興人材爲務。考邑選舉志。洪永成正間。驂軌皇路。代有聞人。沿及國朝。已卯科亦有應獻書而興者。今何以寥落若斯耶。地靈則人傑。文昌閣屹峙兌隅。標一邑之形勝。或者傾圮廢壞。故致此耶。况修舉廢墜。亦某之職也。廼捐俸二。百金以倡。諸生顧學峻等共率私錢爲助。建閣三楹於學宮之旁。層基固址。樸斲完密。櫺扉四照於雲衢之上。閣中神像几筵丹粉一新。請余文以記。余按壁宿爲文。明。掌天上圖書之府。故天下學宮多祀文昌。文者精英。

所聚也。昌者揚天紀也。化書所載梓潼君有七十二化。世所圖縞衣素舄青童白馬者。謂卽梓潼帝君之神。以其出於道家之言。世不盡信。然考之天官書。文昌之宮。厥有六星。懸象著明。昭昭不爽。則揆天藻以敷國華。其必有以上應奎壁之宿。宜斌斌乎多文學之士也。爰爲文以記。復綴以詩曰。蔚矣文昌。帝車之次。斗杓並崇。戴筐是侶。翼翼孔廟。殖殖其庭。爲廣文化。秩祭有經。廣開天門。司命陰騭。仙籙有書。好修獲吉。閣道飛虹。帝睟其容。佑我髦士。起鳳騰龍。梓潼之山。玉驄遙覩。星象聯珠。

神絃載鼓

祭梓潼神君文

唐孫樵

大中十八年七月九日。鄉貢進士孫樵。再拜獻辭張君。靈座之前。樵實頑民。不知鬼神。凡過祠廟。不笑卽唾。今於張君。信有靈云。會昌五。夜躋此山。凍雨如泣。滑不可陟。滿眼漆黑。索途不得。跛馬慍僕。前仆後踣。樵因有言。非燭莫前。須臾有光。來馬足間。北望空山。火起廟墻。焰焰逾丈。飛芒射天。暝色斜透。峻途如晝。樵謂廟奴。苦寒。藁薪取溫。曉及山巔。鑱澀廟門。餘燼莫覩。孰知其然。

大中四年。冒暑還秦。午及山足。猛雨如雹。樵復有言。神誠能神。反雨爲晴。曩火乃靈。斯言纔闕。迴風大發。始自馬前。怒號滿山。劈雲飄雨。使四山去。茲山巍巍。輕塵如飛。訖四十里。雨不霑衣。顧樵當時。嘉神不欺。與神心期。神其自知。今過祠宇。其敢默去。觴酒豆脯。捧拜庭下。神其歆此。

告梓潼神文

明楊廷樞

仕而學。學而後仕。素具宜優。君求士。士亦求君。相須甚切。故欲遇徵龍虎。必先氣感風雲。竊念某矢志君親。立

誠忠孝。讀聖賢書而學其事。嘗有成仁取義之思。做秀才時。而任其業。亦抱先憂後樂之志。休休文圃。畋漁秋實。春華。矻矻芸窗。辛苦冬爐夏扇。但恨捷慚倚馬。七步八斗之未能。巧乏雕蟲。三都兩京之不作。望大鵬而鯤化。魚尾將頰。並下駟以雁行。豕頭多白。七襄不報。箕斗久占虛名。三日為霖。龍蛇猶無定位。况肉食者鄙。徒有其身家。而不有其君父。苟得時則駕。不惜其富貴。而寧惜其功名。何日處囊。早脫毛生之穎。有懷結綬。先彈貢禹之冠。惟神現九十餘化之身。掌三百羣賢之命。權衡

桂籙。定選俊于金簡玉文。頒賜蒞書。登英傑于紫泥黃榜。漢策賢良。而董相居數百人之先。宋舉制科。而蘇軾占第三等之號。斯皆人不愧其科名。亦由天實綏其福祿。若如臣者。實有志焉。願以巧倖。鏤臣肺腸。象罔居臣心腑。文瀾漾碧。筆嶂攢丹。一飛一鳴。凌空霄而萬里。八戰八克。享敝帚以千金。誓當以天地完人。答上蒼生我之意。不敢為溫飽賤士。負朝廷籲俊之心。

上元皇疏

國朝 尤 侗

蓋聞有教無類。聖人之心。改過遷善。學者之事。侗以愚

昧。誤落風塵。久放山林。重遊京國。行藏未定。進退無依。
幸遇元皇。降乩旅次。蒙命杜黃。二真官。教以讀書學道。
懺罪除愆。既奉訓詞。旋加誥勅。寸心永矢。五體常投。今
值春朝。歲將更始。正萬物發育。去故取新之時也。侗雖
不材。豈敢自棄。用陳素悃。昭告明神。竊念侗生在蓬茅。
少攻鉛槧。涉獵經史。茫如面墻。敷衍文章。淺同嚼蠟。不
究心于理學。漫遣興于詩詞。嘲風弄月。嘗賦閒情。問鳥
尋花。每題綺語。嘻笑怒罵。未免傷時。慷慨悲歌。亦嫌憤
世。雖歸遊戲。竟捏虛空。此則侗之罪也。性本直遂。才復

粗疎。輕談臧否。多由口舌。招尤。懶學逢迎。或以儀文。獲
戾。既少知人之哲。并無料事之明。人負我而方疑。事過
前而數悔。不思反躬責己。乃欲怨天尤人。憂讒畏譏。輒
形于色。計功謀利。未絕于心。此又侗之罪也。事親爲大。
守身實難。而侗溫清猶虧。顯揚未遂。生無五鼎之養。沒
無雙表之封。友于兄弟。恐生紿臂之嫌。樂爾妻孥。更甚
畫眉之褻。宋玉好色。闕雖未成。阮咸放情。竊亦僅免。此
又侗之罪也。曾爲小吏。遠在窮邊。當滿漢之雜居。調停
無術。值兵荒之洊至。救濟無方。懸魚清操。尙愧前賢。劾

鼠爰書保無濫罰真心勞而政拙寧吏習而民安三黜
空歸一毫無補此又侗之罪也素懷好道未去三尸粗
解談禪難空五蘊心存布施乃因貧乏而成慳社結放
生時以貪饕而犯殺癡迷習障魔燒紛來漸銷元始精
神豈識本來面目此又侗之罪也兼斯五罪宜墮三塗
何況邪心惡念起滅無時小過微愆舉動常有或求田
問舍角利錙銖或造食營衣戰心靡麗或錢糧逋欠投
牒公門或戶土鬪爭移文鄉曲或心耽歌舞家蓄梨園
或性愛遨遊門彈長鈇或飲酒過度狗欲忘身或博奕

廢時玩物喪志起居失節豈止一日科頭怠惰習成不
但三朝晏起皆由自尊莫道天刑所以一生多咎百事
逢凶五年闈試不登甲乙之科四載宦遊難竊斗筭之
祿饑寒交至仍罹疾病之災父母俱亡復遭喪妻之痛
老羸已逼熒獨堪哀空涕泣以何從將回頭而恨晚今
欲勉自濯磨痛加針砭從前憂患譬如已死此後戒懼
有似更生以文章通性命之原務刪頑艷以道德立功
名之本勿逐炎涼深思吉凶悔吝之幾謹守淫殺盜妄
之戒庶日征而月邁覺今是而昨非凡人窮則呼天維

臣急而籲帝。伏望赦其舊染。策以新圖。照日暮之桑榆。培歲寒之松栢。長楊獻賦。稍叨辟召之榮。五柳掛冠。早遂歸來之計。山間林下。得永餘年。佛宇仙宮。與聞大道。此生邀福。長爲耕鑿之民。他日朝元。重厠掃除之役。鴻恩無量。雀躍難勝。

靈應錄

大帝姓張。諱亞。又諱善勳。忠嗣。孝仲。如意勳。浚。字霽夫。又字仲子。孝友。聖體肥滿。大畧與祠山相似。面顏紫色。隆準。眼大而睛露。口方而紅。額闊而方。耳大而朝口。三

了鬚多而長。兩臉亦有鬚數根。墓在隆慶府。卽今保寧梓潼

縣東二十里。先因姚萇入蜀。與神相遇。借鐵如意以顯

靈。一展如意而陰兵遍野。今演兵壩是也。卽其地祠之。

廟先號九曲。蓋梓潼水來朝。九折而去。後號七曲。化書云。經

行山腹。路成七曲。故謂之七曲。迨至隋唐。其靈尤著。本朝屢顯神功。加

封至八字王廟。號靈應。專判桂祿。傍有風洞。深狹嚴邃。

家慶悉都其間。一堂四世。俱以孝稱。竝受王封。歷仙班。

證佛果。位天帝。其殿有降筆亭。亭中有金索。懸一五色

飛鸞。鸞口銜筆。用金花箋。數百幅。常畱筆下。亭門本府

差官封鎖甚嚴以防欺僞之弊降筆訖其亭內銅鐘自鳴廟吏聞於府府啟鑰取書以觀報應其降筆多勸人以忠孝爲本出書傳錄以範文儒以昌道命昨逆曦僭辰之日具犧牲設俎豆詣殿陳祭甫欲行禮黑風驟起滅燭飛香逆曦震懼俯伏殿下須臾開明視祝版已碎作兩片而案上有安丙二字及逆曦就戮寧皇親作御讚一作頌四肆頌慶府所謂鳳凰山者又在七曲之右去廟七八里有一刹曰榮聖禪寺佛家以爲大帝往來憇息之所每歲九月十八日設祈祿保嗣道塲合蜀之諸神

而奉事之大帝爲主又有應夢臺乃士大夫乞夢之所大帝奉玉旨佐南斗注生由是求嗣者多禱焉因辛卯星變雷杼不靈暫宅鰲山星未周紀奈午未數厄當罹劫火嘗化白衣炳夢理皇求爲興一作名山分化之祠續奉天勅移鸞仗於雲龍山之摩圍洞以駐神蹕假金蓮石著儀範世皆所以安國康民也近又顯夢內庭遂有惠文之渥其誅逆助順之靈異不一而足今又於嶺右之龍江大闡玄風鼎創真宅無非挽人心而復古道後之心香知敬者其鑒之

感應錄

太原忻州城外有雲中山。上有碧霄殿。爲文昌行宮。諸生王用予等十餘人爲文昌社。社中推用予主盟。正統辛酉元旦。用予先期赴行宮宿。甫就枕。覺有促之者。曰。起。帝君升殿矣。用予不覺身出殿外。見列炬燭天。帝君端坐殿上。天下城隍彙報鄉試榜冊。一神朝冠絳服。抱大冊送帝君簽押。用予潛問抱冊神曰。本省榜中有王用予否。神曰。無。絳服者捧冊陳几上。帝君一披閱。每名下書一押。亦有躊躇不下者。良久。絳服者發冊大聲宣

諭云。仍付各省城隍。速查陰德之家。仁厚之子。報名以換各榜之未押者。頃之。忽聞殿內傳呼王用予入見。用予鞠躬進殿。伏地不敢仰視。帝君曰。累年覽爾等表章。虔潔。但功名事爲天曹祕錄。未可輕洩。因汝至誠。故召汝析之。汝家祖父皆樸謹無過。已註爾爲前榜鄉科。因汝生平神前默祝。但自期功名及妻楊氏。孀母在堂。並未祈保一語。以此獲罪。降爾兩科。爾名在下榜五十三名。汝宜孝謹。用予叩頭謝罪。帝君云。爾同社周吉。今科本省榜首也。用予社中惟吉最恂懦。文字不逮。俞郁諸

人聞語不覺愕然。因問發解之故。帝君曰。周吉父祖俱
爲士。從未一字入公門。從未姦淫一婦女。從未形人一
短暴人一惡。且其祖曾作百忍說以訓人。父子祖孫簡
靜基福。註昌三代。今吉發解。特肇端耳。用予又問同社
俞鱗。郁從周未審可發科第否。帝君顧掌卷童子檢閱
之色若不懌。云俞鱗應得一科。因事親腹誹。且谿刻論
人不近情理。故黜其科。用予問何爲腹誹。帝君云。彼父
母凡有言語舉動。鱗心大不然之。但勉強順承。真性日
離。僞心相與。是視親如路人矣。假行竊名。最撓神怒。至

於郁從周。生畀異才。二十六歲應成進士。三十餘歲應
拜侍郎中丞。四十五歲應進大司空。五十四歲以少保
致仕。至六十九歲善終。緣其十七歲爲諸生後。恃才凌
物。諧謔譏彈。冥中錄其輕薄口過。已二千四百七十餘
條。上帝震怒。命註陰惡籍中。悉除所有。倘不知悔。溢三
千條。將奪其壽算矣。淫殺口過。絲粟有報。至涉功名一
途。數者尤爲大忌。至於口頭訕謗。才子機鋒。其罪與殺
生邪淫等。爾輩慎之。因再拜而退。不覺曉鐘驚寤。雞三
號矣。是科榜發。解元果周吉也。

夢徵錄

宋高文虎云。祥符中西蜀二舉子。同行至劍門張亞子廟。號英顯王。二子過廟已昏黑。遂禱於神。各占其得失。祈夢爲信。寢廡下。入夜風雪轉甚。忽見廟中燈燭如晝。殺俎甚盛。人物紛然。往來傳道。自遠而至。聲振四山。皆嶽瀆貴神也。既就席。賓主勸酬如世人。二子恐懼。潛伏暗處觀焉。酒行。忽一神曰。帝命吾儕作來歲狀元賦。當議題。一神曰。以鑄鼎象物爲題。既而諸神皆作一韻。且各刪潤商確。朗然誦畢。當名作狀元者。魂魄授之。二子

默喜。此正爲吾二人發。迨將曉。神乃起別。傳呼而出。視廟中寂然。二子素聰警。各記其賦。寫於書帙。無一字忘。相與拜賜。鼓舞而去。及入試。二生坐東西廊。御題出。果鑄鼎象物賦。韻腳盡同。東廊者下筆思。廟中所書。懵然一字不能上口。間關過西廊。問之。西廊者望見東來者。曰。御題驗矣。我乃不能記。欲起問子。幸無隱也。於是二子交相怒曰。臨利害之際。乃見平生。且此神賜而獨私以自用。天其福爾耶。各憤怒不得意。草草信筆而出。及唱名。皆被黜。狀元乃徐奭也。亟求印賣賦。比廟中所誦。

無一字異。二子歎息。始悟凡得失皆有假手者。遂皆罷筆入山。嗟乎。世務自修爾。營營何益哉。此夢二子知之。徐奭定不知。

證果錄

杭州陳真人某。號尙玄子。虔禮文昌斗懺。刊書行世。嘗感斗降。遂得僊術。端坐而逝。後其父歿時。見輿輦來迎。魂卽乘輿往街市。覩市人呼云。陳真人父來矣。復甦。語家人始歿。此崇禎甲申年事。又少年進士吳復一。歿後三載。降乩于西湖定光菴。自述呂祖導入文昌斗府作

桂魄仙。掌人間祿籍。爲亡友鄭立槐僚屬。所書字畫無異。平昔有請醫方者。輒奇驗。父若弟往訊之。但云負疚天倫。不勝悲愴。更示格言六則。一曰孝敬親。二曰修陰功。三曰謹言行。四曰不出囂謬之談。五曰爲人正直無罔。六曰潛心用功。一念不外。六者備而天祿至矣。

九十七化集唐籤廣陵王

第一籤元命化

世事如花落曉風。三千世界本無窮。分明記得還家夢。畱滯三年在浙東。

薛逢 武元衡 來鵬 白居易

第二籤 化流形

書字纔能記姓名。還同白鶴返遼城。誰人得似張公子。身出山河應數生。

韋蟾 施肩吾 徐凝 方干

第三籤 化生民

寶馬琯弓金僕姑。往來踪跡遍三吳。傷心欲問前朝事。重示瞿塘峽口圖。

歐陽詹 陸龜蒙 竇鞏 薛濤

第四籤 化易俗

異服殊音不可親。百王禮樂頌垂紳。共來百越文身地。日日神君雨露新。

劉禹錫 包何 柳宗元 李頎

第五籤 化稽古

楚鄉卑濕嘆殊方。已帶儒冠事素王。今日始知風土異。九苞鳳藻闢洪荒。

戴叔倫 許渾 元稹 李商隱

第六籤 化奉真

滄波四望通千里。獨向仙祠拜老君。高寄一身雲水外。
九天鸞鶴待成羣。

皇甫冉 馬 戴 羅 鄴 章孝標

第七籤 寧親化

五柳門前聚晚鴉。靈萱萎去更無花。慇懃莫怪求醫切。
神草延年出道家。

崔 峒 郎士元 皮日休 皮日休

第八籤 幽婚化

一夜霜風凋玉芝。祇憑魂夢接親知。與君便是鴛鴦侶。

莫遣佳期更後期。

劉禹錫 劉 駕 杜 甫 李商隱

第九籤 淵石化

姬姜仁厚啟麟振。終日齋心禱玉宸。聞彼夢熊猶未兆。
還隨女伴賽江神。

吳 融 嚴休復 劉禹錫 于 鵠

第十籤 馴雉化

墳上俄生碧草煙。紙錢那得到黃泉。浮生聚散雲相似。
舊日儀容只宛然。

溫庭筠 王建 李羣玉 牟融

第十一籤 化 用流

百尺青崖三尺墳。灌河決州何紛紛。荒村古岸誰家在。靜夜名香手自焚。

溫庭筠 裴耀卿 朱放 皇甫冉

第十二籤 化 降瘟

何事門人廢蓼莪。空聞子夜鬼悲歌。煩君遠示青囊術。若箇溪邊藥最多。

于鵠 李商隱 盧綸 張籍

第十三籤 化 好生

遠岫當軒列翠光。空畱仙洞號華陽。蓬萊道士飛霞札。新授金書八素章。

伍喬 白居易 李羣玉 曹唐

第十四籤 化 天官

神農本草自應知。聖主宣名獎藝奇。世上仙方無覓處。就中南土藉良醫。

崔興宗 易重 徐凝 羅隱

第十五籤 化 薦賢

石上菖蒲節節靈。一人理國致昇平。闢開賢路荆榛掃。
天子曾欽諫議名。

王貞白 包 何 劉 滄 張 籍

第十六籤 格非化

玉陛聲來雉尾高。九重春色醉仙桃。囊中封事賢臣頌。
何事螭頭運兔毫。

耿 漳 杜 甫 崔 日用 孫 蜀

第十七籤 榮歸化

傾朝共羨寵光頻。堯放巢由作外臣。三表自陳辭北闕。

東門悵別柳條新。

韓 愈 白居易 張 籍 劉長卿

第十八籤 敦宗化

憶作兒童隨伯氏。家書頻寄兩三封。百年世澤餘家慶。
秋摘黃花釀酒濃。

韓 愈 楊 凌 戴叔倫 李商隱

第十九籤 歸寂化

幽閣焚香萬慮凝。六時常奉佛前燈。誰能來此尋真諦。
似證禪心入大乘。

鄭 畋 李商隱 白居易 耿 漳

第二十籤 君山化

爲愛君山景最靈。兩層危岫拂眉青。水精樓閣分明見。便欲移家過洞庭。

高 駢 羅 隱 司空圖 李 涉

第二十一籤 感生化

蜀客船從鳥道回。又看天漢躍龍媒。知君憶得前身事。喬梓連雲挺異材。

劉禹錫 司空曙 劉禹錫 崔 峒

第二十二籤 奉先化

白髮如絲日日新。起居八座太夫人。百年壽母同瞻仰。鳳誥鸞章聖善身。

李商隱 杜 甫 于武陵 孫 棨

第二十三籤 孝友化

吾家邁種自虬螭。有子皆如玉樹枝。遙想滿堂歡笑處。子孫蕃育羨螽斯。

韋 旦 朱慶餘 呂 溫 李羣玉

第二十四籤 沔水化

不覺官高怨亦高。空攜筆硯奉龍韜。再三陳乞爐煙裏。
舊德中朝屬望勞。

汪遵 李商隱 王建 郭受

第二十五籤 白駒化

知己新提造化權。問才今是洛陽年。以人事主資公輔。
天網羅才聖主前。

白居易 鄭谷 張詭 林寬

第二十六籤 舉雙化

莫因時俗削孤稜。此日賢關慶得朋。卑散自知霄漢隔。

衛延文子盡同升。

張泌 李父 王建 李敬玄

第二十七籤 恤孤化

顧影庭荒病鶴孤。故交求見一人無。中郎有女能傳業。
深愧三縑恤旅途。

羅隱 元稹 韓愈 平曾

第二十八籤 慈訓化

豈意靈萱臥壟煙。每逢寒食一淒然。相思相見知何日。
泣把山花奠几筵。

柳談 趙嘏 李白 皮日休

第二十九籤 盡忠化

愛日羔裘志五紵。老憂王室泣銅駝。捧盤小吏初宣勅。門冷兼無雀可羅。

劉延 李商隱 張籍 白居易

第三十籤 棲真化

雲似無心水似閒。去年今日侍龍顏。凡情不到支公地。一世清涼住雪山。

陸龜蒙 杜甫 釋皎然 李羣玉

第三十一籤 山王化

劍閣重關蜀北門。村中寥落不堪論。畱將寶劍驅金虎。永錫河山裕後昆。

李白 杜荀鶴 崔魯 賈島

第三十二籤 刑賞化

朱邸新婚樂事饒。女蘿山鬼語相邀。神明鑒自環中運。戒律曾持五百條。

韓翃 李商隱 胡宿 李洞

第三十三籤 存褒化

文帝全書 附錄
微笑時時出瓠犀。可憐人世隔雲霓。陳倉驛吏驚烽火。
幾代荒涼繡嶺西。

權德輿 李 紳 蘇廣文 談用之

第三十四籤 回風化

一片黑雲何處起。舊來詩草半燒焚。若傾家釀招行客。
報德誰能不顧勲。

姚 合 徐 寅 劉禹錫 劉長卿

第三十五籤 明冤化

露滴幽叢見淚痕。巫咸不下問銜冤。空山寂寂開新塚。

寂寞何人吊旅魂。

李山甫 李商隱 劉長卿 韋 莊

第三十六籤 苴邑化

芳蘭慘被嚴霜折。政以回天雨露蘇。叢桂芳聯依玉樹。
歌謠聲徹帝王都。

劉言史 沈 彬 王 渙 姚 鵠

第三十七籤 拯溺化

野流行地沒禾黍。荒霖障天無蒼雲。身非精衛思填海。
井邑家家父母君。

顏真卿 沈佺期 張仲方 章孝標

第三十八籤 兩穀化

空掩柴扉度歲華。耕人訝我久咨嗟。兩師一日三回到。四海於今是一家。

武元衡 鄭谷 施肩吾 李商隱

第三十九籤 曲兩化

碧油幢引向東川。邑有流亡愧俸錢。聞道旱時求得雨。歸來纔及種春田。

白居易 韋應物 韓愈 王維

第四十籤 頌賊化

芙蓉如面柳如眉。鐵石為心冰雪姿。蛇豕盡除三首象。貞心惟有老松知。

白居易 劉靜修 姚合 戎昱

第四十一籤 北郭化

伯道暮年無嗣子。傷心無語奈愁何。自從大士傳心印。子姓如雲擁玉珂。

苗發 許渾 裴休 包佶

第四十二籤 返火化

樂事難逢歲易徂。近來桃李半燒枯。風神爲我掃煙霧。
舊族兵侵大半無。

元 稹 司空圖 施肩吾 羅 隱

第四十三籤 平苴化

萬里沙西寇已平。十年衰老愧稱兄。旌旗四面高秋見。
長擁千山護蜀城。

張 喬 皇甫曾 耿 漳 蕭 遇

第四十四籤 費丁化

蜀魂啼處酒初醒。鑿破天荒問五丁。堪嘆故君成杜宇。

此生何處拜儀形。

李 中 白居易 李商隱 羅 隱

第四十五籤 石牛化

行盡青山到益州。秦開蜀道置金牛。五丁驅得神功盡。
事去人亡跡自留。

張 籍 李 白 陸龜蒙 劉長卿

第四十六籤 五婦化

曉來和淚喪嬋娟。國破君亡不記年。長路關心悲劍閣。
更無人跡有苔錢。

韋莊 裴瑗 杜甫 韓偓

第四十七籤 顯靈化

路遶千巖劍閣斜。力窮難拔蜀山蛇。君看陌上何人墓。落盡春風第一花。

武元衡 李商隱 杜牧 許渾

第四十八籤 大丹化

卜居幽勝遠塵寰。罨畫樓臺青黛山。老氏五千懷寶訓。欲求真訣駐衰顏。

張賁 元稹 杜牧 薛能

第四十九籤 巴都化

江湖今已戮長鯨。按俗承流幾路清。自是神明多感應。此中多恨恨難平。

于武陵 韓翃 劉山甫 羅弼

第五十籤 婆娑化

魏舒偏念外家恩。公道開時敢說冤。惟有夢中相近分。鳳雛聯翼美王孫。

李嘉祐 黃滔 李商隱 盧綸

第五十一籤 戒龍化

把酒相看日又曛。秋濤橫捲半江雲。前朝舊物東流逝。
龍鬪雌雄勢已分。

韋莊 方干 崔塗 常建

第五十二籤 鳳山化

雪彩冰姿號女華。為言流落在天涯。孤帆細雨慈烏泣。
客路秋風旅雁嗟。

張賁 韋莊 包佶 盧僎

第五十三籤 魚腹化

玉腮珠淚灑臨歧。手把花枝唱竹枝。流落天涯誰見問。

此生何幸有歸期。

崔季衡 薛逢 韋莊 劉長卿

第五十四籤 口業化

哭盡傷心淚已枯。終憐舌了舌模糊。文章慧辯皆如此。
不覺悲同楚大夫。

元稹 孫繁 白居易 羅隱

第五十五籤 東郭化

蟠木何材也見知。榮枯只在手中移。不緣眼痛兼身病。
信是沙吒有盜師。

錢起 施肩吾 鄭谷 崔珣

第五十六籤 牛山化

乘蘭佳節客中過。川上俄驚逝水波。幾處州人臨水哭。下歸塵世竟如何。

王駕 白居易 陳羽 司空曙

第五十七籤 天威化

亭午羲和駐火輪。金釵委地髻堆雲。誰能指破三生夢。鵲尾金爐一世焚。

章碣 李山甫 張祐 皮日休

第五十八籤 尚義化

原上鵲鴿無伴侶。于今四海尚淹留。池塘草綠無佳句。誰共芳樽話唱酬。

胡宿 李商隱 白居易 姚揆

第五十九籤 旌隱化

弟子依前學聚螢。送迎終日在郊坰。如今世俗輕前輩。辜負宣尼一卷經。

裴 硯 鄭谷 劉禹錫 方愚

第六十籤 祐正化

祇有家貧免盜憎。追尋往事倍傷情。亂來兒姪皆分散。
戮盡鯨鯢漢水清。

陸龜蒙 元稹 王駕 劉禹錫

第六十一籤 殺生化

並蒂蓮花貝葉文。一靈衣用戒香薰。休公別久如相問。
何亂明朝不茹葷。

王哲 溫庭筠 劉禹錫 皮日休

第六十二籤 酷虐化

喜得君侯妙撫綏。清如冰玉直如絲。花間五馬時行縣。

縱是蒲鞭也莫施。

張蠩 耿湜 劉長卿 呂溫

第六十三籤 憫世化

天上高名世上身。十年風景在三秦。卿雲靄靄輝南極。
我與劉公本是親。

羅鄴 曹松 羅虬 武元衡

第六十四籤 咸陽化

欲朝金闕暫依劉。西入潼關雲樹秋。四皓有芝輕漢主。
江山空結古今愁。

許渾 劉滄 杜牧 燕敬

第六十五籤 化 邛池

夢裏分明入漢宮。亦知恩怨到頭空。龍翻浩海波濤壯。世界興亡落葉風。

王之渙 白居易 韋莊 李中

第六十六籤 化 解脫

八部同瞻一佛身。西方社裏舊相親。今來合掌聽師語。萬里香花結勝因。

廣宣 權德輿 雍陶 裴休

第六十七籤 化 仁政

周有遺風父老賢。改成何用滿三年。二天在頂家家詠。聲價如今滿日邊。

談用之 方干 黃滔 方干

第六十八籤 化 幽明

澄潭到底不生塵。琴在牀頭籙在身。靜守化條無一事。孤衷真可質天神。

方干 王建 武元衡 李旭

第六十九籤 化 籌帷

將畧兵機命世雄。一枝長戟六鈞弓。可憐無定河邊骨。麟閣何人定戰功。

劉禹錫 羅隱 常建 李益

第七十籤 如意化

期君新歲奉恩光。畫省清華接建章。星使自天丹詔下。玉皇新賜羽衣裳。

楊巨源 蘇頌 盧渥 陸龜蒙

第七十一籤 丁未化

薄宦相榮若網牽。雲門天竺舊因緣。武林花木應常在。

記得初騎竹馬年。

盧綸 李涉 李端 韋莊

第七十二籤 水漕化

臺榭參差積翠間。仙舟何處水潺潺。頓蘇萬物焦枯意。血食如今配此山。

薛逢 杜牧 白居易 劉禹錫

第七十三籤 桂籍化

偏將彩筆冠羣倫。金榜高懸姓字真。南國需才爭汲引。九流人物待陶甄。

鄭谷 袁皓 紀唐夫 薛逢

第七十四籤 孝廉化

斗極司權着祖鞭。窮波猶認孝廉船。鵝鴻得路爭先翥。正藉虛公網俊賢。

項斯 張賁 武元衡 于鵠

第七十五籤 感時化

故人相去隔雲泥。纔喜中原息鼓鼙。下馬政成無一事。玉壺春酒正堪攜。

顧况 司空圖 方干 岑參

第七十六籤 神扶化

使節新聲著虎關。令公早已臥東山。謝家池館花籠月。因想興亡自慘顏。

薛能 劉憲 王之渙 羅鄴

第七十七籤 誅暴化

膏以明煎信矣哉。野風吹起紙錢灰。人間歲月如流水。莫遣黃金漫作堆。

李涉 吳融 蕭徹 張祐

第七十八籤 明經化

石門蘿徑與天鄰。獨任斯文擔不分。自是尼山真道脈。
青箱世業著河汾。

鄭谷 孫光憲 林滋 王初

第七十九籤 護聖化

三世勤王國史稱。立朝孤節自稜稜。莫誇十萬兵威盛。
風度何人似九齡。

李商隱 芮挺章 司空圖 吳融

第八十籤 明威化

何處春風種蕙蘭。公車待詔赴長安。誰知二十餘年後。

柱在蟾宮不可攀。

劉商 皇甫冉 張籍 盧肇

第八十一籤 濟順化

百戰山河血未消。不堪人事日蕭條。天涯靜處無爭戰。
南北輿圖總屬堯。

歐陽玄 杜甫 王昌齡 聶夷中

第八十二籤 濟迷化

數片荷衣不滿身。詩書空被市兒嗔。七盤九折難行處。
風雨林中有鬼神。

秦 糸 劉 威 陸 暢 蘇廣文

第八十三籤 化證果

江湖天濶足風濤。蓮葉舟輕自學撿。盡道陰功能濟物。逝波今日去滔滔。

郭 受 郭 受 司空圖 裴 休

第八十四籤 化明良

紫詔徵賢發帝聰。捧持堯日慶雲中。救時相業商霖賜。燮理陰陽禾黍豐。

章 碣 王 建 韋 莊 元 稹

第八十五籤 化忠顯

更值干戈亂起時。夜來飛箭滿梁悤。孤山幾處看烽火。一劍曾當百萬師。

林 寬 皮日休 蓋 運 王 維

第八十六籤 化聖治

兩朝盛際繼虞唐。詞客新開白玉堂。誰是後來修史者。聲名早註御屏傍。

唐彥謙 胡 宿 鄭雲叟 李 鄴

第八十七籤 化武烈

兩川消息未休兵。白挺猶驅婦女行。今日兵符歸上將。劍橫天外八風清。

鄭谷 羅隱 李涉 談用之

第八十八籤興國化

亂餘山水半凋殘。草殞荒山白骨寒。清廟萬年長血食。錦袍輝映日輪丹。

戴叔倫 韓愈 李紳 李益

第八十九籤止足化

帝書徵出白雲鄉。功業汾陽異姓王。金籙新加新品秩。

衣冠身惹御爐香。

曹唐 杜甫 陸龜蒙 賈至

第九十籤真元化

玉清壇上著霓衣。夕捧天書拜紫微。運會風雲初際泰。文昌新入有光輝。

劉禹錫 王維 陳陶 白居易

第九十一籤誅逆化

手披荒草看孤墳。玉樹埋深哭不聞。畢竟百年同是夢。銘旌官爵等浮雲。

劉長卿 李 白 元 稹 白居易

第九十二籤 拔苦化

輅車銜命奉恩輝。幢節飄空紫鳳飛。帝錫蟠花輝黼黻。著書精義入玄微。

司空曙 王昌齡 許 彬 劉 滄

第九十三籤 福瀘化

思結空門香火緣。一觀如幻自忘筌。不知禍起蕭牆內。數到如今四十年。

白居易 苑 咸 胡 曾 朱慶餘

第九十四籤 昭明化

白石溪邊自結廬。韋編歲月紀黃初。雲煙落紙晶光迸。紫鳳朝銜五色書。

曹 唐 羅 隱 杜 甫 司空曙

第九十五籤 亨屯化

年來惆悵與誰論。上帝深居閉九閭。山作劍攢江瀉鏡。成都別是一乾坤。

韓 偓 李商隱 韓 愈 胡 曾

第九十六籤 安南化

蓬萊宮闕壓雲巖。鸞殿分階翊彩旄。聞道蜀江風景好。文昌二十四仙曹。

王建 耿 漳 李 搏 韋 莊

第九十七籤 復古化

不見爐峰二十年。錦城歸路草芊芊。西川舊是經行地。共聽先生講太玄。

齊 己 劉 兼 溫庭筠 陸龜蒙

古詩集卷之六

白萊宮

文選

王建 賦 濟 李 博 章

第九十七 鏡 復古

不見然峰二十年 錦城歸路草芊芊 西川舊是征行地 共聽先生講太玄

齊 己 劉 兼 溫庭筠 陸龜蒙

